

M205W: Pfaffe Konrad: 'Rolandslied' (W)

0,4217 Do quam valsaron .
0,4218 uon der erden dathan unde abiron .
0,4219 was er uerre geuaren .
0,4220 einen guldinen aren .
0,4221 uurte er ane deme scilte .
0,4222 uor der scare er spilte .
0,4223 uon sime helme da scein .
0,4224 ein lihter karfunchilstain .
0,4225 unde ander werc wehe .
0,4226 er was riche unt mere .
0,4227 er sprac "bist du hie oliuir .
0,4228 mir ist dicke gesaget uon dir .
0,4229 du sist der cristen uoruechte .
0,4230 ich han hie gute chnechte .
0,4231 sehs unde zwenzech tusint manne .
0,4232 nu rit du helet under minen uanen .
0,4233 ich hilfe dir gerne hinnen .
0,4234 wilt u helet dingen .
0,4235 daz zu deme cuninge marsilien .
0,4236 du ne maht iz nicht gewideren .
0,4237 behalt lip unde rum .
0,4238 wilt du des nicht tun .
0,4239 dinen podech wirfe ich den himeluogelon .
0,4240 din houbet dar obene .
0,4241 steck ich an einen spiz .
0,4242 alse ich deme cunenge gehiz .
0,4243 unde uure ez ubir dise berge .
0,4244 iz ne si daz ich uil drate ersterbe ."
0,4245 Do antwurte ime der wigant .
0,4246 "ich han ouch liute unde lant .
0,4247 also lange so got wil .
0,4248 mich en dunchet ire inboruil .
0,4249 di du here hast braht .
0,4250 ich han sin anderes gedacht .
0,4251 ich han wider mime scephere gelobet .
0,4252 daz ich necheiner slachte uoget .
0,4253 wider in nimer gewinne .
0,4254 uil bose wirt din gedinge .

0,4255 uor gote ueruluchet .
0,4256 daz er din niht ne ruchet .
0,4257 dinen podech unreinen .
0,4258 din golt unt din gestaine .
0,4259 wirfen ich in die phuze .
0,4260 din leben ist unnuzze .
0,4261 ich ne furchte nehaine dine drowe .”
0,4262 geliche si sic do huben .
0,4263 beide si sprancten .
0,4264 ainander si ane ranten .
0,4265 oliuir durch den heidenen stach .
0,4266 zv der erden er in warf .
0,4267 wider zucte er den spiz .
0,4268 under di heidenen er riph .
0,4269 “wa nu sine scaregesellen .
0,4270 di in recken wellen .
0,4271 di heben sic er zu mir .”
0,4272 sprach der helet oliuir .
0,4273 michel urowede unter den cristenen was .
0,4274 si drungen in naher baz .
0,4275 die cristen riefen “monssioy monsioy .”
0,4276 uil harte quamen di .
0,4277 die ze alleruorderest waren .
0,4278 wande si michel wunder sahen .
0,4279 da di gotes herten .
0,4280 mit den spizes orten .
0,4281 scarphen vnde wassen .
0,4282 wurfen si uon den rossen .
0,4283 si cherten an die diche .
0,4284 si ualten mit eineme blicke .
0,4285 mer dan ses tusint man .
0,4286 der strit was uermezzenliche erhaben .
0,4287 Uon almerie tortan .
0,4288 mit manegeme goltgarewen uanen .
0,4289 stach er den greuen orten .
0,4290 daz er uil toter .
0,4291 er were gerne uon ime dannen .
0,4292 do uersumte er sich ze lange .
0,4293 do sprach der helet maximin .
0,4294 “des ne mach niuwet sin .
0,4295 du ne salt so genozin nicht hine uaren .”
0,4296 du huf er uf den arm .
0,4297 daz houbet er ime abe swanc .
0,4298 do wart ein michel gedranc .
0,4299 da di gotes herstrangen .
0,4300 den ualsarotes mannen .
0,4301 zezarten di shilte .
0,4302 so uaste s im ane gesigeten .

0,4303 daz in stahel nehein urume was .
0,4304 di ir wol gezirten helmuaz .
0,4305 waren alle bliweich .
0,4306 swaz sin daz swert begreif .
0,4307 daz muste enzwei .
0,4308 da wart daz michel gescrei .
0,4309 Do rif der herzoge uon agrentin .
0,4310 di cristenen muzen wole cune sin .